



# *Kattusseqatigiit Partiiat*

15 marts 2012

Inatsisartut suleriaasianni § 37 naapertorlugu apeqquteqaat imaattoq Naalakkersuisunut ingerlateqqippara:

## **Naalakkersuisunut apeqqutit:**

1. Naalakkersuisut sanaartornerup pitsaanerusumik pilersaarusiornissaanut peqqinnarnerusumillu siunissaqarnissamut, piujuartitsinerlu tunngavigalugu sanaartoriaaseqarnissamut piaartumik qanoq iliuuseqalersaarpat?
2. Sanaartornerliorneq pinngitsoorniarlugu sanaartortitsisup nakkutilliisussaataitaneranut atatillugu nunatsinni sanaartornermut issittumut naleqqussakkanik illussanik titartaasartunut aamma ingeniørinut sanaartornermut najoqqutassiornissaq pisariaqarsorineqanngila, assersuutigalugu 1980-ikunni aalisariutit issittumut naleqqussarniarlugit najoqqutassianut assingusumik?
3. Sanaartugassat pitsaasumik ingerlanneqarnissaannut inerneqarnissaannullu siunissamilu aserfallatsaaliinermut akissaajaataaanninnerunissaat anguniarlugu issittumut naleqquttuunerat nalilerniarlugu issittumi sanaartornermut immikkut ilisimasalinnik nalilersuisartussanik pilersitsinissamut Naalakkersuisut suliniuteqarusussinnaappat?
4. Nunatsinni sanaartorneq naleqqussarniarlugu sanaartornerliornerlu pinngitsoortinniarlugu issittumi nunat allat suleqatiginiarneqarpat?
5. Nunatsinni sanaartugassanut pilersaarutit pitsanngornersarniarlugit sanaartornerliornerlu pinngitsoortinniarlugu Sanaartornermik Ilinniarfik, ARTEK aamma issittumi ilinniarfiit allat qanoq annertutigisumik suleqatigineqarpat?
6. Apeqqummi 4-mi nunat apeqqummilu 5-imi ilinniarfiit taaneqartut suleqatigalugit suliniutit tigussaasut suut ingerlanneqarpat?

(Inatsisartunut ilaasortaq Knud Fleischer, Kattusseqatigiit Partiiat)

## **Tunngavilersuut**

Nunatsinni sanaartugassat pilersaarusiornarlugaanerit inissiat il.il. oqummik, ussiinnermik, isugutammik inunnut peqqinnangitsorujussuarmik aningaasartutinillu naatsorsuutiginnngisanik kinguneqartarpoq. Tamanna Danmarkimi sanaartornermik pissutsinut ilaarsiinnapallaarnermik pissuteqarpoq. Meeqqat, inuusuttut, inersimasut utoqqaallumi astmamik peqqissutsimullu

ajoqutaasinnaasunik allanik sunnigaasarput, tamannalu napparsimaneq pissutagaluni atuannngitsuukulanermik sulinngitsuukulanermik inuiaqatigiinnut peqqinnissaqarfimmullu akissaajaataaqisumik nassataqartarpoq.

Sanaartukkat peqqinnartuunissaanut naalackersuinikkut ingerlataqartugut akisussaaffeqarpugut, minnerunngitsumillu sanaartortitsisoq, namminersortuuguni pisortaniluunniit ingerlatsisuuguni, nakkutilliissussaatitaanikkut aamma tamatumani pissaaffeqartariaqarluni.

Ukiut ingerlanneranni tamanna sumiginnagaavallaarsimavoq, nunatsinnimi sannarlutarpasuit inuiaqatigiinnut inuttaasunullumi annertunerujartortumik akisaajaataaginnalersut tamanna takutippaat. Allatut oqaatigalugu akisussaaqataasutut siunissami akisaajannginnerunissamut peqqinarnerusumillu sanaartornermi avatangiiseqarnissamut tamatta ileqqaartariaqalerpugut, kingunissavut artukiinnarnianngikkutsigit.